

दिनांक 25.10.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश की सात विधानसभा सीटों में उपचुनाव सारू पर्चा दाखिल करण के काम पूरे क्यो-97 पर्चा दाखिल करी ज्या।
- प्रधान न्यायाधीश न्यायमूर्ति डी. वाई. चन्द्रचूड कह्यो -लारला 75 साल मांय सुप्रीम कोर्ट असली मायना मांय लोक न्यायालय रा तौर ऊं मजबूत बण्यो।
- राज्यपाल हरिभाऊ बागडे भणार्ई-लिखाई रे जरिये देश अर समाज रा विकास सारू काम करण माथे जोर दीनो।
- प्रदेश रा न्यारा-न्यारा जिला मांय स्वच्छ भारत-स्वस्थ भारत थीम माथे फिट इण्डिया फीडम रन 5.0 राख्यी ज्यी।

000

राज्य की सात विधानसभा सीटों में उपचुनाव सारू पर्चा दाखिल करण के काम आज पूरे क्ये ग्यो। निर्वाचन विभाग ऊं मिली जाणकारी रे मुजब दौसा, झुन्झुनू, देवली-उनियारा, खींवसर, सलूम्बर, चौरासी अर रामगढ़ सीटों में क्ये रह्या उपचुनाव बाबत 97 पर्चा दाखिल करी ज्या। सब ऊं बत्ता 21-21 नामपाना दौसा अर झुन्झुनू सीट सारू भरी ज्या। कांग्रेस की ओर ऊं सलूम्बर सीट ऊं रेशमा मीणा, चौरासी ऊं महेश रोट, दौसा ऊं दीनदयाल, देवली उनियारा ऊं कस्तूर चन्द मीणा, झुन्झुनू ऊं अमित ओला, खींवसर ऊं सवाई सिंह चौधरी, रामगढ़ ऊं आर्यन जुबेर नामजदगी रा पर्चा दाखिल कीना। भाजपा की ओर ऊं सलूम्बर सीट ऊं शान्ता अमृतलाल मीणा, चौरासी ऊं कारीलाल नानोमा, दौसा ऊं जगमोहन, देवली उनियारा ऊं राजेन्द्र, झुन्झुनू ऊं राजेन्द्र सिंह भांभू, खींवसर ऊं रेवंतराम, रामगढ़ ऊं सुखवंत सिंह पर्चा दाखिल कीना। खींवसर ऊं राष्ट्रीय लोक तांत्रिक पार्टी की उम्मीदवार कनिका अर चौरासी सीट ऊं भारत आदिवासी पार्टी रा अनिल कुमार कटारा मुकाबलो रोचक बणा दीनो है। नामपाना की जांच 28 अक्टूबर ने क्येला, जद के नाम 30 अक्टूबर तांई नाम पाछा लिया जा सकेला। 13 नवम्बर ने वोट पड़ेला अर 23 नवंबर ने वां की गिणती करी जावेला।

000

सुप्रीम कोर्ट रा मुख्य न्यायाधीश न्यायमूर्ति डी. वाई. चन्द्रचूड कह्यो है के लारला 75 साल मांय सुप्रीम कोर्ट असल मांय लोक न्यायालय रा तौर ऊं मजबूत बण्यो है। वे कह्यो के देश की सब ऊं ऊंची अदालत कानी ऊं लोक न्यायालय रा तौर ऊं सेवा करण की मिसाल दुनिया मांय कठे ई नी मिले है। सुप्रीम कोर्ट रा 75 साल पूरा क्येवण रे मौके आकाशवाणी समाचार सागे खास बातचीत मांय मुख्य न्यायाधीश न्यारा-न्यारा मुद्दां माथे विचार बताया। न्यायमूर्ति चंद्रचूड कह्यो के दिव्यांगजन सारू अदालतों मांय पहुंच आसान बणावण सारू केई जतन करी ज्या है। सुप्रीम कोर्ट रा 75 साल पूरा क्येवण रे मौके आकाशवाणी समाचार सागे खास बातचीत मांय मुख्य न्यायाधीश कह्यो के सुप्रीम कोर्ट बोलण अर सुणबा मांय परेशानी वाळा वकीलों ने पहली दफा सांकेतिक भाषा जाणबा वाळा दुभाषिया मुहैया करावण की सरुआत कीनी ही।

मुख्य न्यायाधीश सागे आ बातचीत आज रात साढ़े 9 बज्यां आकाशवाणी रा एफ एम गोल्ड चैनल अर अतिरिक्त मीटरों माथे प्रसारित करी जावेला। ओ कार्यक्रम आकाशवाणी समाचार रा सोशल मीडिया प्लेटफॉर्म अर वेबसाइट दमेवदपतण्हवअण्पद अर छमेव्द प्च माथे ई सुण्यो जा सकेला।

स्वास्थ्य अर परिवार कल्याण मंत्री जगत प्रकाश नड्डा कह्यो है के सरकार स्वास्थ्य सेवा सारू सगळां रा भला री सोच रो नजरियो अपनायो है अर अब ओ देश रो खास हलको है। नड्डा नई दिल्ली मांय यूनिवर्सिटी कॉलेज ऑफ मेडिकल साइंसेज रा 53वां स्थापना दिवस अर दीक्षांत समारोह मांय बोल रह्या हा। स्वास्थ्य मंत्री बतायो के पैली देश मांय केवल छह अखिल भारतीय आयुर्विज्ञान संस्थान—एम्स हा जद के मौजूदा दौर मांय एम्स री तादाद 22 व्हे ग्यी है। वे कह्यो के देश रा न्यारा—न्यारा हलकां मांय एम्स खोल र सरकार क्षेत्रीय असंतुलन दूर कीनो है अर स्वास्थ्य री देखभाल रा तीन स्तर रा उन्नत सुबीता मुहैया कराया है। नड्डा कह्यो के देश रा मेडिकल कॉलेजां मांय लारला दस साल मांय एम.बी.बी.एस. अर स्नातकोत्तर कोर्स री सीटां मांय जबरदस्त बढोतरी करी ज्यी है। वे बतायो के सरकार आवता पांच मांय मेडिकल री 75 हजार सीटां और जोड़बा रो फैसलो कीनो है।

राज्यपाल हरिभाऊ बागडे कह्यो है के भणायी लिखाई इंसान ने चोखो बणावे है। वे आज जयपुर मांय एक गैर—सरकारी विश्वविद्यालय रा दीक्षान्त समारोह मांय बोल रह्या हा। राज्यपाल शिक्षा रे जरिए देश अर समाज रा विकास सारू काम करण अर विकसित भारत बणावण रा काम मांय सिरकत करण माथे ज़ोर दीनो। राज्यपाल जूना बगत रा तक्षशिला अर नालंदा विश्वविद्यालयां रो जिक करता थकां कह्यो के आं विश्वविद्यालयां मांय भांत—भांत रा विषय भणायो जाता हा अर नुवी शिक्षा नीति मांय ई ई माथे ज़ोर दियो ज्यो है के विद्यार्थी सगळा विषयां मांय पारंगत व्हे अर वां रो पूरो विकास व्हे। राज्यपाल विश्वविद्यालयां कानी ऊं देशी ज्ञान री परंपरा माथे ध्यान देवण बाबत ई कह्यो।

राज्यपाल 'जयपुर डायलॉग 2024' रा सालाना जळसा मांय कह्यो के ओ बगत म्हाणी सांस्कृतिक अर सभ्यतागत जड़ों री ओर लौटबा रो है। वे जूना भारत रे वैश्विक व्यापार रो केंद्र रहवण री चर्चा करता कह्यो के प्रधानमंत्री 'आत्मनिर्भर भारत' री दृष्टि इण ई संदर्भ मांय दीनी है।

प्रदेश मांय दिसम्बर महीना मांय राख्खी जावण वाली राईजिंग राजस्थान इनवेस्टर्स मीट ऊं पैली जिला स्तर माथे निवेशक सम्मेलन राख्खा जा रह्या है। ई रा तैत आज करौली मांय निवेशक सम्मेलन राख्खी ज्यो। निवेशक सम्मेलन मांय 900 करोड़ रुपया ऊं बत्ता रा करार करी ज्यो। ई दौरान प्रभारी मंत्री जवाहर सिंह बेढम राज्य सरकार कानी ऊं सगळा निवेशकां ने हर भांत री मदद मुहैया करावण रो भरोसो दिरायो। ई मौके विधायक दर्शन सिंह गुर्जर अर हंसराज मीणा ई मौजूद हा।

प्रदेश रा न्यारा—न्यारा ज़िलां मांय आज "स्वच्छ भारत स्वस्थ भारत" थीम माथे फिट इण्डिया फ्रीडम रन 5.0 राख्खी ज्यी। झालावाड़ मांय मिनी सचिवालय ऊं सरू व्हे र मंगलपुरा टेक, घण्टाघर चौराहा अर निर्भय सिंह सर्किल व्हेती थकी पाछी मिनी सचिवालय पूगी। ई दौरान सगळां ने साफ—सफाई राखण री सौगंध दिरायी ज्यी। जोधपुर मांय संसदीय कार्य मंत्री जोगाराम पटेल उम्मेद स्टेडियम ऊं दौड़ ने हरी झंडी बता र रवाना कीनी। ई मौके संसदीय कार्य मंत्री कह्यो के सगळां ने साफ अर फिट इंडिया बणावण रो संकल्प ले र साफ अर स्वस्थ समाज बणावणो व्हेला। बाड़मेर मांय मल्लीनाथ चौराहा ऊं हाई स्कूल ताई एकता दौड़ राख्खी ज्यी। ज़िला प्रमुख महेन्द्र चौधरी एकता दौड़ ने हरी झंडी बता र रवाना कीनी। सवाईमाधोपुर मांय स्वच्छता अर स्वास्थ्य थीम माथे राख्खी ज्यी फिट—इंडिया मैराथन ने जिला प्रमुख सुदामा मीणा

हरी झंडी बता र रवाना कीनी। मैराथन मांय स्कूली विद्यार्थी, खिलाड़ी, जनता रा नुमाइन्दा, अहलकार, कर्मचारी, अर जनता सिरकत कीनी। हनुमानगढ़ मांय जिला कलेक्टर कानाराम दौड़ ने हरी झण्डी बता र रवाना कीनी। ई मौके जिला कलेक्टर स्वस्थ ज़िन्दगी जीवण अर नशो नी करण री शपथ दिरायी। प्रतापगढ़ मांय राख्खी ज्यी फ्रीडम रन मांय विद्यार्थी, अहलकार अर पुलिस रा जवान सिरकत कीनी।

000

शौर्य चक्र ऊं नवाजी ज्यो शहीद मेजर भूपेन्द्र सिंह री मूरत रो आज श्रीगंगानगर मांय अनावरण करी ज्यो। ई मौके फौज री ओर ऊं बारह और शहीद फौजियां रा पिरवार वाळां रो मान करी ज्यो। शहीद मेजर भूपेन्द्र सिंह री बेटी अर अभिनेत्री निमरत कौर बतायो के फौज री ओर ऊं शहीद व्ह्या फौजियां रा पिरवार वाळां ने खूब मदद दी जा रही है। ध्यानजोग है के मेजर भूपेन्द्र सिंह साल 1994 मांय जम्मू-कश्मीर मांय ड्यूटी माथे हा अर वां ने पहलगाम रोड माथे पुल बनावण रो काम संपी ज्यो हो। ई दौरान एक आतंकी संगठन वां रो अपहरण कर लीनो हो अर वे वीरगति हासिल कीनी।

000

झालावाड़ जिला मांय पिड़ावा हलका रा जबलेन गांव मांय बिजली रो करंट लाग जावण रे कारण एक किसान री मौत व्हे ग्यी। पुलिस रे मुजब ई काश्तकार ने पाणत सारू खेत मांय बिजली री मोटर चालू करती बगत करंट लाग ग्यो। पिड़ावा रा अस्पताल मांय डॉ. वां किसान री मौत री जाणकारी दीनी।

000

डीग मांय आज कृषि विभाग री ओर ऊं राष्ट्रीय खाद्य तेल मिशन— तिलहन योजना रा तैत कार्यशाला राख्खी ज्यी, जिण मांय एक सौ ऊं बत्ता किसान सिरकत कीनी। कार्यशाला मांय काश्तकारां ने साखां री बुआई ऊं पैली खेती-बाड़ी रा जाणकारां सागे बातचीत करण री जाणकारी दीरीजी। ई सागे ई किसानां ने गारा रा हालात अर खाद-बीज ऊं जुड़ी जाणकारी हासिल करण सारू मुफ्त नम्बर 1551 रा बारा मांय ई जाणकारी दीरीजी। भरतपुर मांय ई काश्तकारां सारू राख्खी एड़ी कार्यशाला मांय 100 ऊं बत्ता काश्तकार सिरकत कीनी। वां ने चोखी पैदावार सारू समन्वित सिंचाई प्रबंधन, कीट प्रबंधन अर पोषक तत्व प्रबंधन रा बारा मांय विगतवार जाणकारी दीरीजी।

000

प्रधानमंत्री नरेन्द्र मोदी आकाशवाणी ऊं ई दीतवार 27 अक्टूबर ने प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 115 वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे संवारे 11 बज्या प्रसारित कर्यो जावेला। ई सागे ई आकाशवाणी अर दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे अर न्यूज ऑन एआईआर एप माथे ई मन की बात कार्यक्रम प्रसारित कर्यो जावेला।

000